

# 1 Jon

## Te launiu kaamata Jon e taataa

**Na hakataakoto hakamattua i roto te launiu nei:**

Na tattara kaamata *1.1—1.4*

Te maahina ma te pouri *1.5—2.29*

Na tamalliki TeAtua ma na tamalliki Satan  
*3.1—3.24*

Te hakamaoni ma na mee e ssara *4.1—4.6*

Na tiputipu te laoi *4.7—4.12*

Na mahi te hakatina *5.1—5.21*

### *Te Tattara te Ora*

<sup>1</sup> Maatou e tattaa atu i kootou te Tattara te Ora tera ni tipu mai i te kaamata roo. Maatou ellono na tattara Aia raa, tena maatou ekkite roo te Tama raa ma na karemata maatou, tena maatou nittaohi hoki Tama raa ma na rima maatou. <sup>2</sup> Maatou ekkite te Ora raa te saaita te Ora raa ni tipu tama, tena maatou ku tattara i te vahi te Ora raa, tena maatou ku tattara atu kootou i te Ora e ora tahi tera ni noho ma te Tamana raa, tena te aho nei maatou ku illoa te Tama raa. <sup>3</sup> Hea maatou nikkite ia ma hea maatou ni llono raa, maatou ku hakatae atu i kootou hoki, kilavaa kootou te hukui mai maatou, tena taatou ku hukui ma te Tamana ia ma Jisas Krai te Tamariki Aia raa. <sup>4</sup> Maatou e tattaa atu na mee nei ma ki mee taatou ki hihhia hakamaoni.

### *TeAtua ko te Maahina*

<sup>5</sup> Teenei na tattara maatou ni llono i te Tamariki Aia raa, tena maatou ku hakatae atu i kootou:

TeAtua ko te Maahina, tena Aia se isi roo te pouri hokotahi i roto Aia. <sup>6</sup> Tena kame taatou e tattara ma taatou e hukui ma Tama raa, e meia taatou e tauttari koi na tiputipu sakkino, tena taatou e malliu koi inatattara taatou iama na auna taatou raa. <sup>7</sup> Emeia kame taatou e tauttari na tiputipu te maahina pera ma te Tama raa e noho i roto te maahina raa, tena taatou e hukui ma na tama hakaatoa, tena te toto Jisas te Tamariki Aia raa e ssoro taatou no matahua i taha ma na haisara taatou raa.

<sup>8</sup> Kame taatou e tattara ma taatou seisi na haisara, tena taatou e tattara malliu i taatou hokotaatou, tena te hakamaonira se moe i roto taatou. <sup>9</sup> Emeia kame taatou e ui ake na haisara taatou raa i TeAtua, Tama raa e me kittaohi na tattara eivi Aia raa no pena hea etonu: Tama raa e me kissirihia na haisara taatou raa hakaatoa, tena kumee taatou ki matahua inatiputipu sakkino taatou nippena raa. <sup>10</sup> Kame taatou e tattara ma taatou seisi na haisara, tena taatou hoki e me kitattara ma TeAtua he Tama tattara mariu, tena na tattara Tama raa se mmoe hoki i roto taatou.

## 2

### *Krais taatou Tokonaki*

<sup>1</sup> Anau etaataa atu ikootou na tamalliki anauraa kiselavaa kootou teisi na haisara; e meia kame he tama e pena te mee e sara, tena taatou eisi te tama e me kituu no tattara ake TeAtua ma taatou, teenaa ko Jisas Krais te Tama e tonu tahi raa. <sup>2</sup> Ia tena Krais Hokoia ko te Tama koi e lavaa te ssoro na haisara taatou raa itaha, ia seai ma na haisara koi taatou raa, e meia na haisara hoki na tama roo hakaatoa.

<sup>3</sup> Kame taatou e tauttari na tuaa TeAtua raa, tena taatou eme kiilloa hakamaoni pera ma taatou eilloa Tama raa. <sup>4</sup> Kame taatou e tattara ma taatou eilloa Tama raa, emeia taatou se tauttari na tuaa Tama raa, tena taatou ni tama e tattara malliu, tena te hakamaoniraa se moe iroto taatou. <sup>5</sup> Emeia kame taatou e hakallono na tattara TeAtua raa, tena taatou ko na tama e too hakamaoni telaoui Tama raa iroto taatou. Taatou eme kiilloa ma taatou ehukui ma Tama raa: <sup>6</sup> na tama e tattara ma laatou e hukui ma TeAtua raa e tau te tauttari na tiputipu Jisas Krai e isi raa.

### *Te tuua vahao nei*

<sup>7</sup> Aku soa laoi roo, te tuua anau e taataa atu nei sei ma he tuua vahao nei; teenei he tuua imua, te tuua kootou nillono ite kaamata roo. Te tuua imua raa ko na tattara kootou nillono imua. <sup>8</sup> Emeia te tuua anau e taataa atu nei he tuua vahao nei, maitaname kootou ni kkite te hakamaoni te tuua nei raa iroto te ora Krai, ia ekkite hoki iroto na ora kootou. E mee te pouri raa ku haere ki sei, tena te Maahina hakamaoni raa ko na maahina mai avare.

<sup>9</sup> Kame taatou e tattara ma taatou ennoho iroto te maahina raa, emeia taatou e kirilloto koi alaa tama, tena taatou koinnoho koi iroto te pouri raa te vahao nei. <sup>10</sup> Kame taatou elaoi alaa tama, tena taatou ennoho iroto te maahina raa, tena taatou seisi hoki na mee e mmo e iroto taatou tera elavaa te mee alaa tama ki haissara. <sup>11</sup> Emeia kame taatou e kirilloto alaa tama, tena taatou koinnoho koi iroto te pouri raa te ahonei; taatou ehahaere

iroto tepouriraa, tena taatou seilloa ma taatou eoo ihee, maitaname tepouriraa emee na karemata taatou raa no sseni.

<sup>12</sup> Aku tamalliki, anau etaataa atu ikootou, maitaname namahi teinoa Krairaa essoro na haisara kootou raa itaha.

<sup>13</sup> Anau etaataa atu ikootou na tamana, emee kootou eilloa te Tama tera nitipumai ite kaamata roo.

Tena anau etaataa atu ikootou na tautama vahao nei raa, maitaname kootou ku hai mmahi roo no hakahiti vaa aruna na mahi Satan.

<sup>14</sup> Anau etaataa atu ikootou na tamalliki anau raa, emee kootou ku illoa te Tamana.

Anau etaataa atu ikootou na tamana, maitaname kootou ku illoa te Tama nitipumai ite kaamata roo.

Anau etaataa atu ikootou na tautama vahao nei raa, emee kootou ku hai mmahi; na tattara TeAtua raa ku mmoe i roto kootou, tena kootou ku hai mmahi roo no hakahiti vaa aruna na mahi Satan.

<sup>15</sup> Auu selaoi te maarama nei ia ma na mee iroto te maarama nei raa. Kame kootou elaoi te maarama nei, tena kootou ku selaoi te Tamana.

<sup>16</sup> Na mee roo hakaatoa iroto te maarama nei raa; na mee sakkino taatou e hihhairaa ko na mee na tama ekkite no mannako ia ma na mee hakaatoa iroto te maarama nei tera na tama etattara ahuahuraa, tena na mee nei hakaatoa sei ma nimee eoo mai ite Tamana; aanei nimee ehura mai ite maarama nei koi.

<sup>17</sup> Te maarama nei ia ma na mee hakaatoa ite maarama nei raa ku haere kioti, emeia na tama eppena hea TeAtua e hihairaa eme kinnoho tahi roo.

*Na tama e hakataukaa ma Krai*

<sup>18</sup> Aku tamalliki, te hakaotioti raa ku taapiri! Kootou kullono pera ma tetama e me ki hakataukaa ma Krai raa e me ki hamai, tena te saaita nei tammaki na tama e hakataukaa ma Krai raa kuttae mai, tena taatou ku illoa hoki pera ma te hakaotioti raa ku taapiri.

<sup>19</sup> Na tama nei seai ma ni tama hakamaoni i roto te kuturana taatou nei tera hea na tama raa e tiaki taatou no oo i taha raa; peeraa na tama raa ni tama hakamaoni i roto te kuturana nei; na tama naa e me ki nnoho koi ma taatou. Emeia na tama raa e tiaki taatou no oo ma ki huri ake pera ma laatou seh hai i roto te kuturana taatou nei.

<sup>20</sup> Emeia kootou kutoo Te Anana Tapu tera Krai ni kou atu kootou raa, tena kootou hakaatoa ku illoa i te hakamaoni. <sup>21</sup> Tena anau e taataa atu i kootou, se mee ma kootou se illoa i te hakamaoni raa; e meia anau e taataa atu, maitaname kootou ku illoa i te hakamaoni raa, tena kootou hoki e illoa pera ma se isi te tattara mariu e me ki hura i roto te hakamaoni raa.

<sup>22</sup> Tena kaa koai na tama e tattara malliu naa? Aanaa ko na tama e tattara ma Jisas seai ma ko te Mesaia raa. Na tama peenei raa ko na tama e hakataukaa ma Krai, na tama nei se hih hai te Tamana ia ma te Tamariki Aia raa. <sup>23</sup> Maitaname na tama se hih hai te Tamariki raa se hih hai hoki te Tamana, tena na tama e hih hai te Tamariki raa e hih hai hoki te Tamana.

<sup>24</sup> Kootou ki hakamattonu i roto na hatu manava kootou no ttaohi mmou na tattara kootou ni llono i te kaamata raa. Kame kootou e taohi mmou na tattara raa, kootou e me ki nnoho hakaraoi roo ma te Tamariki ia ma

te Tamana Aia raa. <sup>25</sup> Krais Hokoia e tattara hakamaoni pera ma Aia e me ki kou mai taatou te ora e ora tahi.

<sup>26</sup> Anau etaataa atu kootou telauniu nei ina tiputipu na tama e me ki oo atu no malliu atu kootou raa. <sup>27</sup> Emeia ite vahi kootou, Krais kuoti te kou atu TeAnana Tapuraa ikootou. Tena setau hoki he tama ki akoako atu kootou te saaita TeAnana Tapuraa e noho i roto kootou. Maitaname TeAnana Tapu nei e akoako atu kootou na mee roo hakaatoa, tena na mee Aia e akoako atu raa e hakamaoni roo, seisi te mee mariu. Tauttari na akoako TeAnana Tapuraa, tena ku noho hakaapaa ma Krais.

<sup>28</sup> Noo, kootou nitamalliki anau, tena kootou ki hukui ma Tamaraa, maitaname te Aho Aia e me ki vaakaimairaa, taatou e me kittuu semattaku, tena taatou selavaa hoki tennapa no mmuni itaha ma Tamaraa. <sup>29</sup> Kootou e illoa pera ma Krais e tonu tahi, tena kootou ki illoa hoki pera ma na tama hakaatoa e ppena na mee e tonu raa ni tamalliki TeAtua.

### 3

#### *Taatou ni tamalliki TeAtua*

<sup>1</sup> Kootou ki illoa ehia roo te Tamana elaoi taatou! Telaoi Aia itaatouraa erahiroo tera hea taatou e kannaria pera ma nitamalliki Aia, emeia ite hakamaoni, taatou nitamalliki Aia. Tera hea te maarama nei se illoa taatou, ia se illoa hoki TeAtua. <sup>2</sup> Aku soa laoi, te saaita nei taatou nitamalliki TeAtua, emeia taatou se ki illoa te hakamaoni ma taatou e me ki mee peehee. Ia tena taatou e illoa pera ma te saaita Krais e hamairaa, taatou e me kissau pera ma Aia,

maitaname taatou e me kikkite roo te tipu Aia.  
<sup>3</sup> Na tama ennoho ma te hakataakoto ma Krai  
e me ki vaakai mai raa e mee laatou no matahua,  
e ssau pera ma Krai e matahua.

<sup>4</sup> Na tama haissara raa e illoa ma laatou  
e seu natuaa TeAtua, maitaname te haisara  
he mee e seu natuaa. <sup>5</sup> Taatou e illoa pera ma  
Krai nihamai kissoro na haisara taatou raa  
itaha, e meia Aia Hokoia se isi na haisara. <sup>6</sup> Ia  
tena natama hakaatoa e hukui ma Krai raa  
ki selavaa te tauhano no ppena na mee e ssara;  
e meia tetama e tauhano te ppena na mee  
e ssara raa ni se ki te Tama raa, ia ni se illoa hoki  
Tama raa.

<sup>7</sup> Aku tamalliki, auu setiaki na tama  
ki hailavvaka kootou! Na tama e ppena na mee  
ettonu raa ni tama ettonu tahi, e ssau pera ma  
Krai e tonu tahi. <sup>8</sup> Na tama e tauhano te ppena  
na mee e ssara raa ni tamalliki Satan, maitaname  
Satan e ppena na mee e ssara i te kaamata roo.  
Te Tamariki TeAtua raa e hakahura mai ma  
te hakataakoto nei ma ki seu na mee sakkino  
Satan ni ppena raa.

<sup>9</sup> Na tama ma ni tamalliki TeAtua raa selavaa  
te ppena tahi na mee e ssara, maitaname te ora  
TeAtua raa emoe iroto na tama raa; ia tena  
e mee TeAtua he Tamana na tama raa, tena  
na tama raa selavaa te tauhano no ppena na mee  
e ssara. <sup>10</sup> Na tiputipu na tamalliki TeAtua raa  
e kkee roo ma na tiputipu na tamalliki Satan raa:  
na tama selavaa te ppena na mee ettonu raa  
ia ma na tama se isi na laoi laatou i alaa tama raa  
seai ma ni tamalliki TeAtua.

*Laoi alaa tama*

11 Teenei na tattara kootou nillono i te kaamata roo: taatou kilaoi tetama ma tetama. 12 Taatou kisse mee pera ma Kein; te tama raa he tamariki Satan, tera hea aia e taa Abel tetaina aia raa no mate. Aiea Kein e taa tetaina aia raea? E mee aia hokoia e pena hea e sara, tena Abel e pena hea e tonu.

13 Tena aku soa laoi roo, auu se oho kame na tama i te maarama nei raa ku se hihhai kootou. 14 Taatou e illoa pera ma taatou ku tiaki te mate raa kihamai i te kina te ora raa; taatou e illoa maitaname taatou elaoi alaa tama. Na tama se isi na laoi raa e noho i roto na mahi te mate. 15 Na tama e haeo i alaa tama raa ni tama taatama, tena kootou e illoa pera ma na tama taatama raa se isi te ora e ora tahi i roto laatou.

16 Taatou e me ki illoa te laoi raa peenei: Krais e hoki mai te ora Aia raa ma taatou. Tena taatou hoki kihoki ake na ora taatou raa ma alaa tama! 17 Kame taatou e tuttuulaoi, tena taatou kukkite na taina ma na kaave taatou te lotu raa ku tuttuuhaeo, e mea taatou se isi roo na alloha ma kitokonaki na tamaraa, tena kaa taatou e mee ma taatou elaoi TeAtua peehee? 18 Aku tamalliki, taatou kisse ppisi koi na maihu ma taatou elaoi; taatou ki isi te laoi hakamaoni, tena te laoi raa e me kihuri ake i roto namee taatou e penaraa. 19 Tena taatou e me ki illoa pera ma taatou ni tama i roto te hakamaoni raa, tena taatou e me ki ttuu se mattaku i mua na karemata TeAtua. 20 Kame taatou e illoa ma taatou e sara, tena taatou e me ki illoa pera ma TeAtua e hakanaaniu iaruna na hakataakoto taatou raa, maitaname Aia e iroa roo na mee hakaa-toa. 21 Aku soa laoi roo, kame na hakataakoto taatou raa e ttonu koi, tena taatou e me ki se mattaku



tesaaita taatou ettuu imua nakaremata TeAtuaraa. <sup>22</sup> Taatou eme kitoo niaa taatou e kainnoake Tama raa, maitaname taatou e tauttari na tuua Tama raa, tena ki ppena hea Aia e hihai. <sup>23</sup> TeAtua e kou mai te tuua ma taatou ki hakattina iaa Jisas Krai te Tamariki Aia raa, tena kulaoi tetama ma tetama, essau pera ma Krai ni tattara mai taatou raa. <sup>24</sup> Na tama e tauttari na tuua TeAtua raa e hukui ma TeAtua, tena TeAtua e hukui ma na tama raa. Ia tena taatou ku illoa ma TeAtua e hukui ma taatou, e mee TeAnana Tapu TeAtua ni kou mai taatou raa.

## 4

### *TeAnana Tapu TeAtua ia ma te anana Satan*

<sup>1</sup> Aku soa laoiroo, auu se hakattina i na tama hakaatoa etattara ma TeAnana Tapu raa e noho iroto laatoraa, emeia haaite na tama naa ki illoa kootou ma te anana raa he anana hakamaoni TeAtua. Maitaname tammaki na profet malliu kuttae i na kina roo hakaatoa <sup>2</sup> Teenei te ara koi kootou elavaa te illoa ma teenaa ko TeAnana Tapu TeAtua raa hakamaoni: kame he tama etattara pera ma Jisas Krai e hamai no tipu tama, tena te tama naa e isi TeAnana Tapu TeAtua. <sup>3</sup> Emeia te tama se hakattina ma Jisas ni hamai no tipu tama raa se isi TeAnana Tapu TeAtua. Te anana aia eisi raa he anana Satan; kootou e illoa ma te anana Satan raa eme ki hamai, tena te aho nei te anana raa ku tae mai.

<sup>4</sup> Emeia kootou nitamalliki TeAtua, tena kootou e hai mahi roo iaruna na profet malliu raa, maitaname TeAnana e noho iroto kootou raa e hai mahi roo iaruna te anana na tama i te maarama nei raa.

5 Na profet malliu raa e tattara koi na mee i te maarama nei raa, tena na tama te maarama nei raa e hakallono na tama raa e mee laatou ni tama i te maarama nei. <sup>6</sup> Emeia taatou ni tamalliki TeAtua. Na tama e illoa TeAtua raa e me ki hakallono taatou, tena na tama seai ma ni tamalliki TeAtua raa se lavaa te hakallono taatou. Tena taatou e lavaa te illoa te mee e kee ilottonu TeAnana Tapu hakamaoni raa ia ma te anana na tiputipu sakkino raa.

### *Te laoi TeAtua*

<sup>7</sup> Aku taina, taatou kilaoi alaa tama, maitaname telaoi raa e hamai i TeAtua. Te tama e laoi raa he tamariki TeAtua, tena aia e iroa hoki TeAtua. <sup>8</sup> Na tama se isi na laoi raa se illoa TeAtua, maitaname TeAtua ko telaoi. <sup>9</sup> Tena TeAtua e kou mai te Tamariki Aia raa i te maarama nei ki huri mai kikkite taatou telaoi Aia raa, ma kilavaa taatou tetoo te oraraa ina mahi Aia. <sup>10</sup> Telaoi raa e mee peenei: te mee nei se mee pera ma taatou ni laoi TeAtua, e meia TeAtua ni laoi taatou, tena kikauna ria mai te Tamariki Aia raa, tena Aia kissoro na haisara taatou raa itaha.

<sup>11</sup> Aku soa laoi roo, kame TeAtua ni laoi taatou peenei, tena taatou hoki kilaoi te tama ma te tama. <sup>12</sup> Se haitama ni kite TeAtua, e meia kame taatou e laoi te tama ma te tama, TeAtua e me ki noho i roto taatou, tena telaoi Aia e moe i roto taatou raa e me ki hakamaoni.

<sup>13</sup> Taatou e illoa te hakamaoni pera ma taatou e hukui ma TeAtua, tena TeAtua e hukui ma taatou, maitaname Aia ku oti te kou mai TeAnana Tapu Aia raa. <sup>14</sup> Tena taatou ku oti te kkite

no tattara ake alaa tama pera ma te Tamana ni kauna ria mai te Tamariki Aia raa ki tokonaki na tama ite maarama nei raa ki ora. <sup>15</sup> Kame taatou e tattara pera ma Jisas ko te Tamariki TeAtua, tena taatou e hukui ma TeAtua, tena TeAtua e hukui ma taatou. <sup>16</sup> Tena taatou hoko-taatou e illoa no hakattina i te laoi TeAtua e isi ma taatou raa.

TeAtua ko telaoi, tena natama ennoho iroto telaoiraa e hukui ma TeAtua, tena TeAtua e hukui ma laatou. <sup>17</sup> Kame telaoiraa e hai mahi roo iroto na ora taatou, tena taatou eme ki selavaa te mattaku ite Aho Hakatonutonuraa, emee na ora taatou ite maarama nei raa essau pera ma te ora Krai. <sup>18</sup> Natama elaoiraa seisi na mattaku; telaoi hakamaoniraa e hakaise na mattaku hakaatoa itaha. Kame kootou e mattaku, tena kootou seisi telaoi hakamaoni iroto na ora kootou, maitaname te matakuraa e hamai ma na hakalono lihu.

<sup>19</sup> Taatou elaoi maitaname TeAtua ni laoi taatou kaamata. <sup>20</sup> Kame taatou e tattara ma taatou elaoi TeAtua, emeia taatou e haeo koi ialaa tama, tena taatou nitama koi e tattara malliu. Maitaname taatou selavaa telaoi TeAtua taatou sekkite raa kame taatou selaoi na tama taatou ekkite raa. <sup>21</sup> Te tuaa Krai e kou mai taatou raa e mee peenei: na tama elaoi TeAtua raa kilaoi hoki alaa tama.

## 5

### *Hakattina i te Tamariki TeAtua*

<sup>1</sup> Natama hakaatoa e hakattina ma Jisas ko te Mesaia raa nitamalliki TeAtua, tena na tama elaoi te Tamana laatou raa elaoi hoki

na tamalliki Aia raa. <sup>2</sup> Taatou e me ki illoa pera ma taatou e laoi na tamalliki TeAtua raa peenei: taatou kiisi telaoui TeAtua, tena kutauttari na tuaa Aia raa. <sup>3</sup> Maitaname na laoi taatou i TeAtua raa ehuri mai ma taatou kitauttari na tuaa Aia raa. Tena na tuaa Aia raa se hainatta ma taatou, <sup>4</sup> maitaname na tamalliki TeAtua raa hakaatoa elavaa te hakahiti iaruna na mahi ite maarama nei. Tena taatou ki hai mmahi ma na hakattina taatou raa no tuku iho na mahi ite maarama nei raa i raro. <sup>5</sup> Koai na tama e lavaa te hakahiti iaruna na mahi ite maarama nei? Aanaa ko na tama koi tera e hakattina ma Jisas ko te Tamariki TeAtua raa.

### *Na tattara hakamaoni i te vahi Jisas Krai*

<sup>6</sup> Jisas Krai ko te Tama e hamai ma te vai i te saaita te hakoukou tapu Aia raa, tena ki hamai ma te toto ite saaita te mate Aia raa. Tama raa se hamai koi ma te vai, e mea Aia e hamai ma te vai ia ma te toto. Tena TeAnana Tapu raa e huri pera ma te mee nei e hakamaoni, maitaname TeAnana Tapu raa ko te hakamaoni. <sup>7</sup> E toru na mee nei e huri mai te hakamaoni: <sup>8</sup> TeAnana Tapu, te vai ia ma te toto; na mee e toru nei hakaatoa e huri mai te hakataakoto hokotahi koi. <sup>9</sup> Taatou e hakattina na tattara na tama; e mea na tattara TeAtua raa e hai mmahi roo, tena na tattara raa e hakari mai na tipu tipu te Tamariki Aia raa. <sup>10</sup> Tena na tama hakaatoa e hakattina i te Tamariki TeAtua raa e too na tattara nei i roto na hatu manava laatou; e mea na tama se hakattina i TeAtua raa e huri ake pera ma TeAtua he Tama tattara mariu, maitaname na tama raa se hakattina i na tattara TeAtua e tattara ake i te Tamariki Aia raa.

11 Na tattara raa e mee peenei: TeAtua e kou mai te ora e ora tahi, tena te ora nei e moe i na rima te Tamariki Aia raa. 12 Tetama e hukui ma te Tamariki TeAtua raa e me ki too te ora e ora tahi, tena tetama se hukui ma te Tamariki TeAtua raa se lavaa te too te ora raa.

### *Te ora e ora tahi*

13 Anau e taataa atu ki illoa kootou na tama tera e hakattina i te Tamariki TeAtua raa pera ma kootou ku too te ora e ora tahi raa. 14 Taatou e me ki se mattaku te ttuu i mua na karemata TeAtua, maitaname taatou e illoa hakamaoni pera ma Aia e rono na mee taatou e kainno ake tera e tau ma te maanatu Aia raa. 15 Tama raa e rono he saaita peehee taatou e kainno ake Aia, tena e mee taatou e illoa ma teenei he mee hakamaoni, tena taatou e illoa hoki pera ma Aia e kou mai hea taatou e kainno ake Aia raa.

16 Kame kootou e kkite he hakatina ana e pena te mee e sara tera aia setau te taia ria ki mate, tena kootou kulotu ake TeAtua, tena Aia e me ki kou ake te ora te tama naa. Te mee nei e haere i na tama e ppena na mee e sara tera setau te taia ria ki mmate raa. Emeia e isi te haisara e me kikkave kootou i te kina te mate, tena anau se meatu ma kootou kilotu ake TeAtua ma na tama peenei. 17 Na tiputipu sakkino hakaatoa ni haisara, e meia e isi na haisara tera te tama se tau te taia ria ki mate.

18 Taatou e illoa pera ma na tamalliki TeAtua raa se lavaa te tauhano te ppena na mee e sara, maitaname te Tamariki TeAtua raa e tokonaki na tama raa, tena Satan se lavaa hoki te mee hakahao na tama raa.

<sup>19</sup> Taatou e illoa pera ma taatou nitamalliki TeAtua, niaina ma temaarama nei hakaatoa ennoho iraro na mahi Satan.

<sup>20</sup> Taatou e illoa pera ma te Tamariki TeAtua raa ni hamai no kou mai na illoa taatou, ma ki illoa taatou TeAtua e hakamaoni raa. Taatou e hukui tahi ma TeAtua e hakamaoni raa, tena ki hukui hoki ma Jisas Krai te Tamariki Aia raa. Te nei ko TeAtua hakamaoni, tena Aia ko te ora e ora tahi.

<sup>21</sup> Aku tamalliki, kootou ki aua roo itaha ma na atua malliu raa.

**Nukumanu**  
**The New Testament in the Nukumanu language of**  
**Papua New Guinea**  
**Nupela Testamen long tokples Nukumanu long**  
**Niugini**

copyright © 2020 Wycliffe Bible Translators, Inc.

Language: Nukumanu

Contributor: Wycliffe Bible Translators, Inc.

All rights reserved.

2023-03-22

---

PDF generated using Haiola and XeLaTeX on 21 Feb 2024 from source  
files dated 22 Mar 2023

54439682-f8e2-586d-98e1-295d02f74287